

## NORÜ TAXRE GA POPERA GA PEDRU ÜMATÜXÜ

*Pedru nüxü narümoxë ga yema yaxõgüxü*

<sup>1</sup> Pa Chaueneëgüx, choma i Chimáü i Pedru nixĩ i pexcèx chanaxümatüxü i ñaã popera. Rü choma rü Ngechuchu ya Cristuarü ngüxëëruü chixĩ, rü nüma nixĩ ga choxü namuxü na nüxü chixuxücèx i norü ore. Rü pexcèx chanaxümatü i pema na toxrüü aixcüma peyaxõgüxü, erü tórü Tupana rü tórü Maxëxëëruü ya Ngechuchu ya Cristu rü aixcüma nimexëchi.

<sup>2</sup> Rü ñuxma na Tanatü ya Tupanaxü pecuáxü rü tórü Cori ya Ngechuchuxü pecuáxü, rü chanaxwèxe i nümagü aixcüma pemaã namecüma rü aixcüma pexü nataãëxëë.

*Yaxõgüxücümagüchiga*

<sup>3</sup> Rü Tupana rü noxrütama poramaã marü tüxna nanaxã ga guxüma i ngëma nacüma i mexü i inaxwèxexü na aixcüma meã naxcèx imaxëxücèx. Rü yemaãcü nanaxü ga yexguma tüxü nüxü nacüëxëëgu ga guma tórü Cori ya mexëchicü ga norü poramaã tüxü decü.

<sup>4</sup> Rü yematama norü poramaã tüxna nanaxã ga guxüma ga norü ngüxëë i mexëchixü ga inaxunetaxü na naxrüü pimexücèx rü nüxna pixigachixücèx i guxüma i chixexügü i duüxügüarü ngúchaü i chixexügagu ñoma i naãnewa ngëxmaxü.

<sup>5</sup> Rü ngëmacèx penaxwèxegü na pegü peporaexëëxü na yexeracü peyaxõgüxü rü meã

togüpëxewa pemaxëxü. Rû ñuxuchi name na meãma nüxü pecuáxü na tacü yíixü i Tupana pexü naxwëxexü.

<sup>6</sup> Rû ngëxgumarüü ta penaxwëxegü na meã pegümaã ipecuáxü na tama chixexügu peyixüçèx. Rû ñuxüchi name na yaxna pegümaã pexĩnüëxü. Rû ngëxgumarüü ta name na aixcüma Tupanaxü pengechaügüxü.

<sup>7</sup> Rû ñuxüchi penaxwëxegü na pegü pengechaügüxü ya guxãma i pemax. Rû ngëxgumarüü ta name na guxüma i duüxügüxü pengechaügüxü.

<sup>8</sup> Rû ngëxguma aixcüma ngëma pexü chaxucuxëxüãcüma pemaxëgu, rû tãütãma natüçexma nixĩ i perü maxü, rû tãütãma natüçexma nixĩ na nüxü pecuáxü ya tórü Cori ya Ngechuchu ya Cristu.

<sup>9</sup> Natürü yixema tama ngëma pexü chaxucuxëxüãcüma maxüxë, rû ñoma tangexetüxürüü tixĩ. Rû ñoma wüxi i duüxü i tama nagu rüxĩnüxü i ngëma yixcüra tá nüxü ngupetüxürüü tixĩ, erü nüxü itayarüngüma na ñuxãcü Tupana tüxü nüxü ngechaüxü ga tümaãrü pepadugü.

<sup>10</sup> Rû ngëmacèx, Pa Chaueneëgüx, name nixĩ na yexeraãcü meã Tupanacèx pemaxëxü na ngëmaãcü ipenawéxüçèx na aixcüma Tupanaãrü duüxügü ya pexcèx naçaxe rü pexü dexe na pixĩgüxü. Rû ngëxguma ngëmaãcü pemaxëgu rü tagutãma chixexügu peyi rü tagutãma Tupanaxü ípetèx.

<sup>11</sup> Rû ngëmaãcü ya Tupana, rü tá meã pexcèx nayawãxna i ñãx na tauxchaãcü pichocuxüçèx i ngextã guxügutãma ãëxgacü íyíixüwa ya tórü Cori

ya Ngechuchu ya Cristu ya tórü Maxëxëëruŭ.

12 Rŭ ngëmacèx woo marŭ nüxŭ na pecuáxŭ rŭ nagu na pexĩxŭ i ngëma ore i aixcŭma ixĩxŭ, natŭrŭ guxŭgutáma pexna nüxŭ chacuèxãchixëëëcha ga yema pexŭ namaã chaxucŭxëxŭ.

13 Erŭ ñuxma na chamaxŭxŭ i chomax, rŭ nagu charŭxĩnŭ na namexŭ na pexna nüxŭ chacuèxãchixëëxŭ i ngëma ore i namaã pexŭ chixucŭxëgŭxŭ, na ngëmaãcŭ pexŭ changúxchaŭxëëxŭcèx na meã Tupanacèx pemaxëxŭ.

14 Rŭ pemaã nüxŭ chixu i ngëma, erŭ tórü Cori ya Ngechuchu ya Cristu choxŭ nüxŭ nacuèxëë na paxa tá chayuxŭ.

15 Rŭ ñoma rŭ ta na chamaxŭxŭ, rŭ meã pexŭ chixucŭxëgŭ na ngëxguma chayŭxguwena rŭ guxŭguma nüxna pecuèxãchiexŭcèx i ngëma chorŭ ucŭxëgŭ na ñuxãcŭ Tupana naxwèxexŭ na pemaxëxŭ.

*Pedru rŭ namŭcŭgŭ rŭ aixcŭma Cristuxŭ nadaugŭ ga na ñuxãcŭ namexëchixŭ*

16 Rŭ yexguma pexŭ tangúexëëgu na ñuxãcŭ naporaxŭ ya tórü Cori ya Ngechuchu ya Cristu rŭ ñuxãcŭ tá wena na nataeguxŭ, rŭ tama tomatama togüãëwa tayaxuxŭ i ore nixĩ. Yerŭ tomatama toxetŭmaã nüxŭ tatau na ñuxãcŭ namexëchixŭ i nŭma ya tórü Cori.

17 Rŭ nüxŭ tatau ga yexguma Tanatŭ ya Tupana nüxŭ icuèxŭŭgu. Rŭ nüxŭ taxĩnŭë ga yexguma gumatama Tanatŭ ya Tupana ya Mexëchicŭ ñaxgu:

“Daa nixĩ ya Chaune ya nüxũ changechaũxũchicü.  
Rü choma rü poraãcü namaã  
chataãẽxũchi”,

ñaxgu.

18 Rü aixcüma tomaxũchima nüxũ taxĩnũẽ ga yema Tupanaga ga daxũguxũ ga naãnewa inaxũxũ, yerü tomatama rü tórü Corimaã tayexmagü nawa ga guma mèxpũne ga üünene ga yexguma yema ngu-petügu.

19 Rü yemaãcü nüxũ tadau na aixcüma yiĩxũ ga yema ore ga nuxcümaũgũxũ ga Tupanaãrü orearü uruũgü nüxũ ixugũgũxũ. Yerü yema nüxũ yaxugũgũxũrũtama nixĩ ga nüxũ tadauxũ. Rü name nixĩ i pema rü ta aixcüma meã nagu perũxĩnũẽ i ngẽma ore, erü wüxi i omü i íraxetũxũ i ãnẽxũwa ibaxixũrũũ nixĩ. Rü ngẽma ore rü tá pexũ nüxũ nacuèxẽẽ i Tupanachiga ñuxmatáta ínangu ya tórü Cori ya Ngechuchu ya Cristu ya yima woramacuri ya ngunetũxũ ngócürũũ ixĩcü. Rü ngẽxguma ínanguxgu i nüma rü aixcüma tá meã pexũ nüxũ nacuèxẽẽ i guxũma i nachiga.

20 Natürü chanaxwèxe na guxũãrü yexera nüxũ pecuáxũ i ñaã ore i tá pemaã nüxũ chixuxũ. Rü dücax, taxúema tüechamatama nüxũ tacuèx i tacũchiga na yiĩxũ i Tupanaãrü ore i ümatũxũ, ega Tupanaãẽ i Üünexũ tama tüxũ rüngũxẽẽgu.

21 Yerü taxuũma ga Tupanaãrü orearü uruũ rü nüẽchamatama nügũãẽwa nanayaxu ga yema ore ga nüxũ yaxugũgũxũ. Natürü yexguma yema orexũ yaxugũgũgu, rü Naãẽ i Üünexũ nixĩ ga yadex-agũxẽẽxũ.

## 2

### *Doramaã duïxügüxü ngúexëxüchiga*

<sup>1</sup> Natürü nuxcüma rü nayexma ta ga Tupanaärü orearü uruügüneta ixīgüxü ga Yudiügütanüwa. Rü ngëxgumarüü tá ta petanüwa nangëxma i duïxügü i nguxëëruügüneta ixīgüxü. Rü nümagü rü tá doramaã nanaxüchicüü i Tupanaärü ore, rü ngëmaäcü tá pexü nangúexëë i ore i dora ixixü na pexü nawomüxëëgüxücèx. Rü nümagü rü täütáma naga naxñüëchaü ya yima tórü Cori ya Ngechuchu ya Cristu ya norü Maxëxëëruüchirëx ixícü. Rü ngëmagagu ya Tupana rü ngürüächi tá nanapoxcue i ngëma duïxügü i ngëmaäcü maxëxü, rü tá inayanaxoxëë.

<sup>2</sup> Rü nümagü rü tá nüxü nixugü na tama wüxi i chixexü yïxü ega woo taxüneärü ngúchaü ixüxgu. Rü muxüma i togü i duïxügü rü tá nawe narüxï i ngëma chixexü i naxügüxüwa. Rü ngëma chixri pexü ngúexëëxügagu rü muxüma i togü i duïxügü rü tá chixri nachiga nidexagü i Tupanaärü ore i mexü i aixcüma ixixü.

<sup>3</sup> Rü nümagü i ngëma duïxügü i chixexü rü tá nügüna nananugüchaü i guxüma. Rü ngëmacèx tá pemaã nüxü nixu i ore i chixexü ixixü na ngëmaäcü pexü nawomüxëëgüxücèx rü pexü ngixü nayauxgüxücèx i perü dïëru. Natürü tá napoxcue i ngëma duïxügü, rü täütáma nibuxmü. Erü Tupana rü woetama nuxcü mama nanamexëë i ngëma poxcu.

<sup>4</sup> Yerü ga Tupana rü tama nüxü nüxü nangechaü ga norü orearü ngeruügü ga daxüçüãx ga pecadu ügüxü. Rü yemacèx ínaxëãnexüwa i ngoxogüxü

ínapoxcuexűwa nanawogű. Rű cadenamaã nayanèıxgű na ngema nangẽxmagűxűcèx ñuxmatáta nawa nangu i ngẽma ngunexű i nagu Tupana nüxna çaxű i guxűma i duűxűgű.

<sup>5</sup> Rű yexgumarű ta ga Tupana rű tama nüxű nüxű nangechaű ga yema nuxcűmaűgűxű ga duűxűgű ga chixexű űgűxű. Rű yemacèx mucű ga taxűchicű naxcèx yema nanamu na gumamaã nadaiãxűcèx ga yema duűxűgű ga chixexű űgűxű. Natürű ga Tupana rű Noexű nadau ga na meãma duűxűgűxű yaxucuxègűxű na nüxű naxoexűcèx ga norű chixexűgű. Rű yemacèx ga Tupana rű Noexű namaxèẽ namaã ga 7 ga natanűxűgű. Natürű nanadai ga guxűma ga yema togű ga duűxűgű.

<sup>6</sup> Rű Tupana rű yexgumarű ta inayanaxoxèẽ ga guma ãnegű ga Chodoma rű Gomora ga poraãcű chixri duűxűgű nawa maxêne. Rű ínanagu ga guma ãnegű ñuxmata norű tanimacaxicatama íyaxű. Rű yemaãcű nanaxű na guma ãnegű rű wűxi ga cuèxruű na yűxűcèx nüxű ga yema duűxűgű ga chixexű ga yemawena maxèxű.

<sup>7</sup> Natürű ga Chodomawa rű Tupana nanamaxèẽ ga Lox ga wűxi ga yatű ga mecű ixícű ga poraãcű ngechaűcű ga yexguma nüxű nadèuxgu ga ñuxãcű chixri na namaxèxű ga yema duűxűgű ga natanűwa nayexmaxű.

<sup>8</sup> Rű guxű ga ngunexűgu rű nüma ga Lox ga meã maxűcű rű poraãcű naãewa nangux ga yexguma nüxű nadèuxgu rű nüxű naxínűgu ga yema chixexűgű ga naxűgűxű ga yema duűxűgű ga natanűwa nayexmaxű.

<sup>9</sup> Rű yema Loxű na namaxèẽxűrűű ga Tu-

pana, rü nüxü natauxcha na tüxü ínanguxüxëxü i ngëxguma Chataná tüxna ñügu ya yixema meã maxëxë. Rü ngëxgumarüü ta ya yixema chixexü ügüxe, rü nüxü natauxcha na poxcuwa tüxü nangëxmagüxëxü ñuxmatáta nawa nangu i ngëma ngunexü i nagu guxüma i duüxügüxü yacagüxü.

10-11 Rü Tupana rü aixcüma tá nanapoxcue i ngëma duüxügü i naxüneärü ngúchaügu íxü i tama naga ñnüëchaüxü ya tórü Cori. Rü ngëma duüxügü rü taxúegama naxñnüëchaü, rü nadauxcüraxüwëxegü rü nügüguxicatama narüxñnüë. Rü tama namuüë na namaã naguxchigagüxü i ngëma ãëxgacügü i daxücüãx i Tupanatüüwa ngëxmagüxü. Rü ngëmaäcü namaxë i ngëma duüxügü. Natürü woo Tupanaärü orearü ngeruügü i daxücüãx i ngëma duüxügüxü rüyexeraxüchichirëxü, rü namuüë na ngëmaäcü namaã naguxchigagüxü i ngëma ãëxgacügü i daxücüãx i Tupanatüüwa ngëxmagüxü.

12-13 Rü ngëma nguxëëruüguneta, rü ñoma naëxügürüü nixïgü, rü naëxügürüü taxuüma nacuëxgü. Rü ngëma naxünegü naxwëxexü nixï i naxügüxü. Rü nabue na ñoma naëxügü i yayauxgüxü rü nadëixürüü yixïgüxüçëx. Rü chixri nachiga nidexagü i ngëma tama nüxü nacuëxgüxü. Natürü ngëma chixexü i naxügüxügagu tá inayarütauxe, rü ngëmaäcü ngúxü tá ningegü nagagu i ngëma ngúxü i toguãxü yangexëëgüxü. Rü nümagü rü namaã nataäegü i ngëma chixexü i ngunecütama naxügüxü. Rü ngëxguma pemaã nachibüegu, rü wüxi i chixexüchixü rü ãnexüchi nixïgü erü ngëma rü ta nanaxügü i norü chixexügü i namaã pexü nawomüxëëgüchaüxü.

14 Rū ngēma duŭxŭgŭ rŭ taxuacŭma wŭxi ya ngeāxŭ nadaugŭmare, erŭ naāēwa rŭ nagu narŭxīnŭē na nŭxŭ tangŭchaŭxŭ. Rŭ tama nŭxŭ ninguéga na pecadu naxŭgŭechaxŭ. Rŭ naxcèx nadaugŭ na ñuxācŭ chixexŭgu tŭxŭ nayixēēxŭ ya yíxema duŭxēgŭ ya turaearŭ maxŭāxgŭxe. Rŭ nŭxŭ nicuèxŭchi na ñuxācŭ tacŭ nŭgŭna nanugŭexŭ. Natŭrŭ Tupana rŭ marŭ namaā nanaxuegu na napoxcueāxŭ.

15 Rŭ ngēma duŭxŭgŭ rŭ tama nagu naxī i ngēma Tupana nŭxŭ naxwèxexŭ, rŭ ngēmacèx inayarŭtauxe. Rŭ nagu naxī ga yema chixexŭ ga nagu yaxŭxŭ ga nuxcŭmaŭxŭ ga Tupanaārŭ orearŭ uruŭ ga Baráŭ ga Beú nane ga chixexŭ ŭxŭ na yemaācŭ dīēru ngīxŭ nayaxuxŭcèx.

16 Rŭ noxrŭtama buru ga woo taguma idexachirēxcŭ, rŭ wŭxi ga duŭxŭrŭŭ namaā iyadexa rŭ inanga naxcèx ga yema chixexŭ ga naxŭchaŭxŭ. Rŭ yemaācŭ Baráxŭ íyachaxāchixēē na tama naxŭāxŭcèx ga yema chixexŭ ga naxŭchaŭxŭ.

17 Rŭ ngēma duŭxŭgŭ rŭ taxuwama nime ñoma wŭxi i puchu i ngearŭ dexáāxŭrŭŭ. Rŭ ñoma wŭxi i caixanexŭ i buanecŭ icuexŭrŭŭmare nixī na taxuwama yamexŭ. Natŭrŭ Tupana rŭ marŭ nanamexēē i wŭxi i nachica i ēānexŭchixŭ i ngextá guxŭgutáma ínapoxcueāxŭwa i ngēma duŭxŭgŭ.

18 Rŭ ngēmaācŭ tá nanapoxcue i ngēma duŭxŭgŭ, erŭ nŭgŭ yacuèxŭŭgŭācŭma chixri nidexagŭ i ore i taxuwama mexŭmaā. Rŭ tŭxŭ nixucuxēgŭ na tŭmaxŭneārŭ ngŭchaŭgu na taxīxŭcèx ya yíxema marŭ ngexwacèx ngēmaxŭ rŭxoechiréxe.



19 Rū tümamaã nüxü nixu rü ngëxguma nawe tarüxixgu rü tá tüxü ínganguxüxëẽ na taxuümëxëwa tangëxmagüxücèx rü tüma tanaxwèxexüãcüma tamaxëxücèx. Natürü ngëma duüxügü i ngëmaãcü chixri idexagüxü, rü nümagütama rü norü chixexütüüwa nangëxmagü. Erü guxüma i duüxügü, rü ngëma nüxü rüyexeramaëxütüüwa nügü nangëxmagüxëẽ.

20 Rū guxãma ya yíxema marü tórü Cori ya Ngechuchu ya Cristu ya tórü Maxëxëëruüxü cuèxgüxe, rü marü nawa ítanguxü i ñoma i naãneärü chixexügü. Natürü ngëxguma chi wenaxärü naxcèx tawoegugu i ngëma chixexü i nawa ítanguxüchiréxü, rü tümaärü me yixígu na wena ngëma chixexütüüwa tangëxmagüxü, rü aixcüma noxriarü yexera tichixe.

21 Erü ngëxguma chi nüxü tacuèxgüguwena nüxü tarüxoegu i ngëma ore i mexü ga noxri tayauxgüxü, rü narümemã chi nixí ga noxtacüma tãü chima nüxü na tacuèxgüxü i ngëma maxü i aixcüma mexü.

22 Tupanaärü ore i ümatüxüwa rü ñanagürü:

“Ngëma airu i nügü oxgüxü, rü wenaxärü naxcèx nataegu i norü oxü na yaweaxücèx. Rü ngëma cuchi i norü yora meãma aiyachiréxü, rü ngëxgumatama wenaxärü norü aiyaneçèx nataegu”,

ñanagürü i ngëma orewa. Rü ngëxgumarüü nixí i ngëma duüxügü i marü Tupanaärü orexü cuèxgüchiréxü rü ñuxüchi wenaxärü naxcèx woeguxü i norü chixexügü ga noxri nawa ínganguxüchiréxü.

### 3

#### *Tórü Coriarü taeguchiga*

<sup>1</sup> Pa Chaueneëgü ya Pexü Changechaügxex, ñaã nixĩ i ngëma norü taxre i popera i pexcèx chaxümatüxü. Rü yema nüxĩraüxü ga poperawa pemaã nüxü chixuxürüü, rü wena pexü chixucuxëgü rü pexna nüxü chacuèxächixëë na aixcüma meã Tupanaärü oregu perüxĩnüëxücèx.

<sup>2</sup> Rü chanaxwèxe i nüxna pecuèxächie i ngëma ore ga nuxcümaügxü ga Tupanaärü orearü uruügü ga ixüünexü nüxü ixugügüxü. Rü ngëxgumarüü ta chanaxwèxe i nüxna pecuèxächie i ngëma tórü Cori ya Ngechuchu ya tórü Maxëxëëruüärü mugü ga pexü nangüexëëxü ga norü orearü uruügü ga nüma pexütawa namugüxü.

<sup>3-4</sup> Natürü chanaxwèxe i guxüärü yexera nagu perüxĩnüë i ñaã ore i pemaã tá nüxü chixuxü. Rü dücax, rü ngëxguma nagüxchaügu i ñoma i naãne, rü tá ínangugü i duüxügü i chixexü i nagu íxü i naxüneärü ngüchaügu. Rü nümagü rü tá nacugüeäcüma ñanagürügü:

“Dücèx, Cristu inaxuneta na wena núma naxüegaxü. ¿Rü tacü namaã nangupetü i ñüxma na tama ínanguxü? Rü marü düxwa nayue ga tórü oxigü ga yaxögüxü, natürü noxri naãne üxgumama rü nanangëxgumaraüëchatama i guxüma”, ñanagürügü tá.

<sup>5-6</sup> Natürü ngëma duüxügü i ngëmaäcü idexagüxü rü tama nüxü nacuèxgüchaü ga yema ngu-petüxü ga yexguma Tupana ñoma ga naãnewa namuãgu ga guma mucü ga tacü ga iyanaxoxëëcü

ga guxūma ga tacū ga ñoma ga nañnewa yexmaxū. Rū nuxcūmaxūchima naxūpa ga guma mucū rü woetama nayexma ga ñoma ga nañne rü guxūma i daxūwa nūxū idauxū ga Tupana ngoxēēxū ga yexguma namuāgu na nangóxūcèx. Rū yemaācū dexáchiüwa nangox ga ñoma ga nañne rü dexáarü ngāxūtüchiüwa nayexma, yerü yemaācū nanamu ga Tupana.

<sup>7</sup> Natürü ngēma ñuxma ngēxmaxū i daxūwa nūxū idauxū rü ñoma i nañne rü Tupana namaā nanguxū na yixcama üxüwa yaxaxūcèx, yerü yemaācū namaā nanaxuegu. Rū ngēma ñoma i nañne rü ngēma daxūwa nūxū idauxū, rü yima üxü ya Tupana nūxū ixuxūnewa tá nixi i aixcūma ínaguāxū i ngēma ngunexū i nagu naxunetaxūgu na napoxcueāxū rü chixexūwa nawoguāxū i ngēma duūxūgü i tama naga ínüēchaūxū.

<sup>8</sup> Rū ñuxmax, Pa Chaueneēgü ya Pexū Changechaūgūxex, tama chanaxwèxe i nūxū ipeyarüngümaē na wūxitama i ngunexū rü tórü Coricèx rü 1000 ya taunecürüū yīxū. Rū ngēxgumarūū ta, 1000 ya taunecü rü tórü Coricèx rü wūxitama i ngunexürüū yīxū.

<sup>9</sup> Rū ñuxre i duūxūgü rü nagu narüxīnüē na tãütáma paxa ínanguxū ya tórü Cori yema tamaā inaxunetaxürüū. Natürü nüma ya tórü Cori rü tama nanuxcüāē na yanguxēēāxū i ngēma norü uneta, natürü nüma rü tamaā yaxna naxīnūmare. Erü nüma rü tama nanaxwèxe na texé iyarütaxuxū, natürü nanaxwèxe na guxāma nūxū rüxoexū i tümacūma i chixexū.

<sup>10</sup> Natürü ngēma ngunexū i tórü Cori nagu ínguxū, rü taxúema nagu ínanguxēēxūgu tá nixi.

Erü ngürüächimare tá ínangu ñoma wüxi i ngítèxáxü ínguxürüü. Rû ñuxüchi guxüma i tacü i daxüguxü i nañewa ngëxmagüxü rü tá tagaãcü niwãixgü rü ngëmaãcü tá inayarütauxe. Rû yima üexcü rü tauemacü rü woramacurigü rü êxtagü rü tá nixae rü ngëxma tá nayarüxogü. Rû ngëxgumarüü tá ta i ñoma i nañe rü tá nixa namaã i guxüma i tacü i nawa ngëxmagüxü.

11 Rû ñuxma na ngëmaãcü tá namaã nangu-petüxü i guxüma i tacü i ngëxmaxü, rü yexeraãcü penaxwèxe na aixcüma Tupanapëxewa pixüünexü rü nüma nanaxwèxexüãcüma na pemaxëxü.

12 Rû name nixĩ i meã ípenanguxëë i ngëma ngunexü i nagu tá ínanguxü ya tórü Cori ya Tupana. ¡Rû paxa guxüwama nüxü pixu i norü ore rü aixcüma naxcèx pemaxë na ngëmaãcü ípenanguxëëxücèx! Rû ngëma ngunexügu rü guxüma i daxüwa nüxü idauxü rü tá nixa rü tá inachaxichigü. Rû ñoma i nañe rü üexcü rü tauemacü rü êxtagü rü yima üxümaã tá inachaxichigü.

13 Natürü yixema na yaxõgüxü rü ítananguxëë i ngëma ngexwacaxüxü i daxüguxü i nañe rü ngexwacaxüxü i ñoma i nañe ga Tupana tamaã ix-unetaxü. Rû ngëma rü guxütáma name, rü yixema rü tá ta aixcüma time.

14 Rû ngëmacèx, Pa Chaueneëgü ya Pexü Changechaügüxex, rü ñuxma na ípenanguxëëxü i ngëma, rü name nixĩ i aixcüma meã pemaxë rü aixcüma pegü pengechaügü na taxuwama nachixexücèx i perü maxü rü aixcüma petaãëgüxücèx i ngëxguma wena núma naxüxgu.

15 Rû name nixĩ i nüxna pecuèxãchie na yaxna

tamaã naxĩnũxũ ya tórũ Cori, erũ nanaxwèxe na tũxũ nangẽxmaxũ i tórũ maxũ i taguma gúxũ. Rũ ngẽmatama pexcèx chanaxümatũxũrũũ ta nixĩ ga pexcèx naxümatũãxũ ga taeneẽ ya nũxũ ingechaũgücũ ya Pauru ga yexguma Tupana napo-  
 raxẽẽãcũma pexcèx naxümatũãgu.

<sup>16</sup> Rũ guxũma ga norũ poperawa rũ ñãã pexcèx chaxümatũxũchiga nanaxümatũ ga Pauru. Natürũ yema pexcèx naxümatũxũwa rũ nangẽxma i ñuxre i ore i guxchaxũ na nũxũ icuáxũ na ñacũchiga yĩxũ. Rũ ngẽma duũxũgũ i tama aixcũma Tupanaxũ cuèxgũxũ rũ tama aixcũma yaxõgũxũ, rũ nanaxüchicüügũ i ngẽma ore ngẽxgumarũũ na guxũma i Tupanaãrũ ore i ümatũxũ naxüchicüügũxũrũũ. Natürũ ngẽma chixexũ na naxügũxũgagu rũ nügũ tátama inayarütauxexẽẽ.

<sup>17</sup> Rũ ngẽmacèx, Pa Chaueneẽgũ ya Pexũ Changechaũgũxex, rũ ñuxma na nũxũ pecuáxũ i ñacũ tá na ngupetũxũ, rũ name nixĩ i pexuãẽgũ na tama pexũ nawomüxẽẽgũxũcèx i ngẽma chixexũ i duũxũgũ rũ tama nũxũ perüxoexũcèx na meã peyaxõgũxũ.

<sup>18</sup> Rũ ngẽmacèx, Pa Chaueneẽgũx, penaxwèxe na pegũ peporaexẽẽxũ na wüxichigũ i ngunexũ yexeraãcũ tórũ Cori ya Ngechuchu ya Cristu ya tórũ Maxẽxẽẽruũxũ pecuáxũcèx rũ yexeraãcũ nũxũ picuãetanũxũcèx na ñuxãcũ aixcũma pexũ nangechaũxũ. ¡Rũ ngẽmacèx rũ guxũgutáma rũ ngĩxã nũxũ tixuèxũgũ! Rũ ngẽmaãcũ yĩ.

Rũ nuãma pexna,  
 Pedru

**Tupanaarü Ore i Tóru Cori ya Ngechuchu ya  
Cristuchiga  
New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

**Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Ticuna

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022

9d5dc22a-30be-5d26-85a9-76047f4c89e6